

Survetsch divin alpester a Plaun lom

Arranschament dalla vischnaunca da pleiv Lumnezia miez

■ (cp) Per la secunda ga ha la vischnaunca da pleiv Lumnezia miez envidau la populaziun ad in survetsch divin alpester sper il lag d'ennevar a Plaun lom. Sco gia igl onn vargau ha il Chor Vocalis Lumnezia embelliu la messa. Nies plevon sur *Peter Aregger* ha astgau far beinvegni a biebein 300 persunas tier la messa e suenter al gentar communabel.

La pleiv ha retschiert ina lubientscha extraordinaria per la grillada, cun restricziuns app. il scamond da far fiug. Dus pumpiers ein stai presents cun utensils necessaris durant igl entir temps dall'occurrentia. Per il gentar ei vegniu priu si ina collecta che vegn dedicata cumplei-



La messa campestra a Plaun lom ei vegnida celebrada da sur Peter Aregger ed embellida musicalmein dil Chor Vocalis Lumnezia. MAD

namein a famiglias en basegns. La vischnaunca da pleiv Lumnezia miez engrazia cordialmein a tuts ch'han priu part da quei di ed han susteniu cun ina donaziun quei intent.

Nus engraziein alla vischnaunca Lumnezia per la lubientscha ed il metter a disposiziun e transport da meisas e bauns. A tuttas calustras e lecturas da nossas pleivs Degen, Morissen, Vella e Vignogn per purtar salatas e pettas.

Il resuns e compliments dattan a nus gronda satisfacziun e motiveschan da cuntinuar cun quei di.

Marco Sgier, president dalla vischnaunca da pleiv Lumnezia miez.